


Vischnaunca da Medel/Lucmagn



**Lescha davart igl encurir cristallas e minerals
ed il lavar aur
per la vischnaunca da Medel/Lucmagn**

Art. 1 Validitad

¹ Questa lescha regla il cavar cristallas e minerals sco era il lavar aur independamein dalla proprietad dil schischom. Ella vala per igl entir territori dalla vischnaunca da Medel.

² La lubientscha sa vegnir retratga mo tier l'administraziun communal.

Art. 2 Lubientscha da cavar cristallas e minerals

¹ La lubientscha per cavar cristallas e minerals vegn concedida a persunas naturalas che han cumplenu il 18avel onn e che possedan ina assicuranza da responsabladad enviars tiarzas persunas. Quella sto cuvierer sufficientamein donns materials e da persunas.

² Per siglientar drova ei ina lubientscha supplementara. Quella obtegnan mo persunas sesentas en vischnaunca (scret d'origin) che han cumplenu il 20avel onn e che possedan in attest da siglientar che corrispunda alla lescha federala. Per siglientar vegn incassau ina taxa supplementara.

³ Il diever da tuttas maschinas ei scumandaus. En cass excepziunals sa la suprastanza communal lubir l'utilisaziun da maschinas da furar cun incassar persunter ina taxa supplementara.

Art. 3 Lubientscha per lavar aur

¹ Scadin che lava aur basegna ina permissiun. Per menar ed organisar gruppas a basa commerciala basegna ei supplementarmein ina lubientscha dalla suprastanza communal.

² Il petent sto haver cumplenu 18 onns. Plinavon sto el esser en possess d'ina assicuranza da responsabladad.

Art. 4 Cuoz dalla lubientscha

¹ La lubientscha per cavar cristallas e minerals ei mintgamai valeivla per igl onn calendar.

² La lubientscha per lavar aur vala sil pli baul naven digl 1. da matg entochen ils 15 da settember. Igl ulteriur temps eis ei scumandau da lavar aur en tuts flums ed uals.

Art. 5 Intents scientifics ed excursiuns

¹ Persunas ch'encueran cristallas e minerals spirontamein per intents scientifics (docents, assistents, students da scola aulta dalla geologia, petrografia, mineralogia e cristalografia) e che prendan a casa mo musters, obtegnan gratuitamein ina lubientscha da cavar cristallas. Ellas astgan duvrrar sulettamein puntga e marti e ston dumandar la suprastonza per ina lubientscha.

² Participonts d'excursiuns organisadas da cavacristallas drovan negina lubientscha.

Art . 6 Scamonds temporals

Firaus inclusiv firaus locals e dumengias eis ei scumandau da lavar aur sco era da cavar cristallas e minerals.

Art . 7 Scamonds locals

¹ Igl ei scumandau da cavar cristallas:

- a) en uauls serrai;
- b) sigl intschess da plontaziuns e da lavineras;
- c) sin scarpas da sendas e vias.

² Sche motivs impurtonts pretendan, sa la suprastonza communal restrenscher ni scumandar il cavar cristallas e minerals era en auters territoris.

³ Durent lavar aur eis ei scumandau:

- a) da deviar uals e flums;
- b) da cavar giu e donnegiar terren carschiu suenter las rivas da flums ed uals;
- c) da donnegiar uors e rempars sco era ulteriuras ustonzas.

⁴ Igl ei scumandau da lavar aur en reviers dil schurmetg da pesca.

⁵ Plinavon sa la suprastonza communal decretar scamonds da lavar aur en loghens nua ch'ei vegn fatg surdiever ni ch'il prighel d'erosiuns periclitescha il contuorn.

Art. 8 Sgols cun helicopter

¹ Sgols cun helicopter en connex cun l'explotaziun da cristallas e minerals drovan ina lubientscha speciala dalla suprastonza communal.

² Quella lubientscha vegn concedida mo en connex cul transport da cristallas gia explotadas.

Art. 9 Responsablidad

Il cavacristallas sco il lavader d'aur

- a) sto prevegnir a scadin donn, surtut enviers persunas, animals, baghetgs ed indrezs publics e privats.
- b) ei responsabels per ils donns ch'el caschuna cun encurir cristallas e minerals ed il lavar aur.
- c) ha da rumir siu plaz da lavur, aschia ch'ei exista negin prighel per glied ed animals.

Art. 10 Schurmetg dalla cava

¹ Ha il cavacristallas aviert in fuorn, denton aunc buca finiu l'explotaziun, vala quel per occupaus, aschinavon ch'il cavacristallas lai anavos in u plirs uaffens, silmeins denton ina puntga e marca il fuorn cul num e datum. Duront ils proxims dus onns astga in fuorn occupau buca vegnir explotaus d'autras persunas.

² In cavacristallas astga occupar silpli dus fuorns en vischnaunca; en mintga cass buca entiras preits crap.

³ Per il lavader d'aur exista negin schurmetg dil plaz. Banduna el siu plaz da lavar ei quel da tut temps accessibels per in auter lavader d'aur.

Art. 11 Utensils lubi per lavar aur

¹ Igl ei lubiu da far diever da suandonts utensils per lavar aur:

- a) pala;
- b) cazzetta ni taglier, respectiv dratg;
- c) canals entochen ina lunghezia maximala da 1.20 m.

² L'utilisaziun ed il possess d'ulteriurs utensils, maschinas da tuttas sorts ed il diever da mieds chemics ei scumandau.

Art. 12 Anfladas specialas da cristallas, minerals ed aur

Anfladas da bellezza singulara e da considerabla muntada ein d'annunziar alla suprazion communal. La vischnaunca sa acquistar tals exemplars cun pagar ina indemnizaziun commensurada. Quella vegn fixada d'ina cumissiun dil fatg neutrala, risguardond ils cuosts d'explotar.

Art. 13 Survigilanza

¹ Mintga possessur d'ina lubientscha el senn dils art. 3 e 4 da questa lescha sto haver cun el la lubientscha sco era la carta d'identidad.

² Las personas incaricadas cun la survigilanza ein legitimadas da controllar in e scadin, aschinavon ch'ins suppona ch'el mondi per cristallas e minerals ni lavi aur.

Art. 14 Taxes

¹ Ei vegn incassau suandontas taxas

Per cavar cristallas e minerals:

- | | |
|---|-----------|
| a) per personas domiciliadas en vischnuanca | fr. 50.— |
| b) per burgheis grischuns e per Svizzers domiciliats el Cantun | fr. 200.— |
| c) per ulteriurs Svizzers ni per personas digl exteriur domiciliadas en Svizra (permissiun C) | fr. 250.— |
| d) per tuttas ulteriuras personas digl exteriur | fr. 400.— |
| e) cartas dall'jamna | fr. 100.— |
| f) per cartas dil di | fr. 20.— |

² Las taxas per lubientschas supplementaras da schluppentar muntan:

- | | |
|--|-----------|
| a) per schluppentar senza far diever da maschinas da furar | fr. 100.— |
| b) per schluppentar cun far diever da maschinas da furar | fr. 200.— |

³ Pil lavar aur:

(Affons e giuvenils entochen la vegliadetgna da 18 onns en accompignament da carschi gratuit)

- | | |
|---|-----------|
| a) per personas domiciliadas en vischnuanca | fr. 50.— |
| b) per burgheis grischuns e per Svizzers domiciliats el Cantun | fr. 200.— |
| c) per ulteriurs Svizzers ni per personas digl exteriur domiciliadas en Svizra (permissiun C) | fr. 250.— |
| d) per tuttas ulteriuras personas digl exteriur | fr. 400.— |
| e) cartas dall'jamna | fr. 100.— |
| f) per cartas dil di | fr. 20.— |
| g) cartas da famiglia per in di (geniturs ed affons) | fr. 30.— |

⁴ L'adattaziun dallas taxas per las lubientschas succeda entras la suprastanza communal.

Art. 15 Diever dallas taxas

La mesadad dallas entradas ord las lubientschas da cavar cristallas, minerals ed il lavar aur sto vegnir impundida per igl acquist d'ina collecziun da cristallas e minerals.

Art. 16 Tgisa

Ils survigiladers, ils cavacristallas ed ils lavaders d'aur han d'annunziar surpasaments da questa lescha alla suprastanza communal.

Art. 17 Castitgs

Surpassaments da questa lescha vegnan puni entras la suprastanza communal cun fallonza da tochen fr. 2'000.—. Ils objects anflai entras surpassar las prescripziuns restan proprietad dalla vischnaunca e vegnan buca indemnissai.

Art. 18 Retratga ni snegada dalla lubientscha

Vegnan las prescripziuns da questa lescha buca observadas, sa la lubientscha dada vegnir retratga. Plinavon san ins snegar novas lubientschas.

Art. 19 Mieds legals

Encunter decisiuns e disposiziuns dalla suprastanza communal sa vegnir recurriu enteifer 20 dis suenter la communicaziun alla Dertgira administrativa dil cantun Grischun.

Art. 20 Execuziun

La suprastanza communal conceda tuttas lubientschas, dessegna ils survegladers e procura l'execuziun da questa lescha.

Art. 21 Abrogaziun

Questa lescha remplazza la lescha davart igl encurir cristallas e minerals sin igl intschesch dalla vischnaunca da Medel/Lucmagn dils 15 da december 2000.

Art. 22 Approbaziun e vigur

Questa lescha ei vegnida approvada dalla radunonza communal dils 12 da zercladur 2014 e passa immediat en vigur.

Il president communal:

Il canzlist communal:

Peter Binz

Valentin Pally